

Prijelazna Vlada Brčko Distrikta približava se kraju svog mandata

Obzirom da Vlada Brčko Distrikta ulazi u posljednjih 90 dana svog mandata, supervizor za Brčko, Susan R. Johnson, jutros je održala sastanak sa gradonačelnikom Brčkog i šefovima odjela Vlade Brčko Distrikta kako bi sa njima dogovorila najbolji način da iskoriste preostali dio mandata u interesu svih građana Distrikta.

Rezultat konzultacija bilo je usklađivanje radnih planova, i postavljena su tri prioritetna projekta za svaki odjel. Supervizor Johnson podstakla je šefove odjela Vlade da zajedničkim snagama nastave realizirati projekte koji proizlaze iz naloga supervizora od 29. travnja.

Supervizor Johnson je istakla neke od glavnih oblasti koje predstavljaju problem za supervizora i jednako tako za građane Distrikta, a koje su potvrđene velikim brojem pritužbi građana koje stižu u Ured supervizora i primjedbi koje supervizor dobija u svojim kontaktima sa građanima širom Distrikta. Određene radnje – one koje se odnose na proces zapošljavanja u upravi Distrikta – su posebice naglašene i moraju biti promijenjene, a ova vlada ima 90 dana da utvrdi nove standarde.

“Kada sam držala govor u Domu kulture ubrzo nakon mog dolaska, prije šest mjeseci, istakla sam da je dosta postignuto, ali da se još dosta toga mora uraditi. Na tu izjavu danas bih željela dodati – da, dosta je postignuto i znam da su mnogi javni službenici dali svoj veliki doprinos uspješnosti Distrikta – međutim, mnogo toga ostaje da se uradi a na raspolaganju nemate mnogo vremena.”

“Znam da je ova godina bitna u političkom smislu i da su

šefovi odjela izloženi velikom broju pritisaka koji u običnim okolnostima ne bi niti postojali. Međutim, ovo nije isprika da se zaustavi ili uspori rad ili da se ovlasti ili resursi vlade koriste u političke svrhe", izjavila je supervizor.